



Enio Caisâr al è stât pal mont di frut in sù. In fornâs, di siet vot agns. E tes minieris di cjarvon, di grant. Cence contâ la cumbinazion di lâ pal mont che in zoventût la puare int e à vût in timp di vuere.

Za in etât, al jere stât a vore in feriere pes Gjermaniis.

Une sere, o sin dute la parintât te arie a scartossâ un grum di blave, tun legri svoletâ par aiar di panolis e peraulis di int in vore.

O jeri frut. Jenfri une glagn di sium, o sint gno barbe Enio che al conte de Gjermanie.

“Barbe” gjo, “âstu imparât a fevelâ gjermanic in Gjermanie?”

Cuntune panole in man, lui mi cjale un moment sorepinsîr. Po al segne cu la panole mê none Miane che e veve passade di un pieçut la otantine.

“Disi a Miane li mo” dissal gno barbe, “che a provi a fevelâ todesc!”

Al veve patidis tantis pe sô strade. Al veve vût ancje i siei biei moments. Nol à mai pierdût il

gust di gjoldi des tantis minusaiis de vite.

Za vieli, al zuiave di cjartis un dopo cene su la taule cun Milie che i tignive companie. La partide e jere stade tirade fin tal ultin, cjapant e molant in sorte ce che i vignive sù.

Contâts che al à i ponts e vinte fuarce di vitis la partide, la fie lu viôt content ridi di cûr. E po poiâsi su la taule tun grumut, cul mac des cjartis ancjimò in man.

Al jere muart di contentece.

di Ivano Urli

#911